

## Evening Dogri News Bulletin, 15 May 2024

इवनिंग डोगरी न्यूज़ बुलेटिन

समे-18:15 Hrs

### Headlines

- 1 केंद्री गृह मंत्री ते बीजेपी दे सीनियर लीडर अमित शाह होरें आखेआ ऐ जे बीजेपी सरकार पाकिस्तान दे नजैज कब्जे आले जम्मू-कश्मीर गी वापस लैने लेई पूरी चाल्ली दृढ़ संकल्प ऐ।
- 2 जम्मू-कश्मीर च पेश आए दे बक्ख-बक्ख सड़क हादसें च 5एं लोकें दी मौत।
- 3 भारतीय फौज नै पुंछ जिले दे नियंत्रण रेखा कन्नै लगदे डब्बी ग्रांऽ च सोलर लाइटां लोआइयां न जेदे नै लोकें गी मती सुविधा होआ रदी ऐ।
- 4 भारत 6-जी टेकनालजी आली समर्थ मुल्ले दी डिजिटल अर्थ बवस्था गी निग्गर बनाने ते उत्पादन बधाने च मती लाहकारी साबत होग।

<><><><><><>

### Amit Shah

केंद्री गृह मंत्री ते भारतीय जनता पार्टी दे नेता अमित शाह होरें आखेआ ऐ जे भारतीय जनता पार्टी दी सरकार पाकिस्तान दे कब्जे आले जम्मू-कश्मीर गी वापस लैने आस्तै बचनबद्ध ऐ। पच्छिम बंगाल दे गुगली च इक रैली गी संबोधित करदे होई शाह होरें आखेआ जे पाकिस्तान दे नजैज कब्जे आले जम्मू-कश्मीर दे लोक पाकिस्तान थवां आजादी दी मंग गी लेइए प्रदर्शन करा रदे न। केंद्र शासित प्रदेश जम्मू-कश्मीर च बदी दी सैलसफा गतिविधिएं बारै बोलदे होई गृह मंत्री होरें आखेआ जे 2 करोड़ सैलानी कश्मीर आए ते नमां रिकार्ड बनाया ऐ।

<><><><><><>

### Accident

साम्बा, पुंछ ते रामबन जिले च पेश आए दे बक्ख-बक्ख शिड़क हादसें च 5 लोक मारे गए न जिंदे च इक हौली उमरी दी इक कुड़ी बी शामिल ऐ। जम्मू-पठानकोट शिड़क पर सांबा च इक पुल पर .. दा आवा रदे इक ट्रक नै दो पहिया वाहन गी टक्कर मारी दिती। पुंछ दे सुरनकोट इलाके च इक यात्रु गड्डी जिसी 26एं बरें दा इक्क व्यक्ति चला रदा हा, शिड़क थवां रूलकिए हेठ नाले च जाई पेई ते औदी मौके पर गै मौत होई गई। बनिहाल च पेश आए दे इक शिड़क हादसे च इक 17 बरें दी कुड़ी दी उस्सलै मौत होई गई जिसले तेज रफ्तार ट्रक नै उसी टक्कर मारी। पुलस नै डरैवर गी गिरफ्तार करी लैता ऐ। रामबन च पेश आए दे इक शिड़क हादसे च इक डरैवर दी मौत होई गई ते 2 यात्रु उस्सलै घायल होई गए जिसले इक तेज रफ्तार ट्रक नै खडोते दे डम्पर गी टक्कर मारी दिती। घायलें गी इलाज लेई नेडे दे अस्पताल लेता गेआ ऐ। मारे गेदे डरैवर दी पंछान कीती जा रदी ऐ।

<><><><><><>

### Poonch-Dhabhi Village

जम्मू-कश्मीर दे पुंछ जिले दा ग्रां डब्बी जेहड़ा नियंत्रण रेखा कोला मसां कोई 600 मीटर दे छिंडे पर ऐ उत्थूं दे लोक इनें दिनें फौज दिआं सिफतां करदे नेई थक्का रदे की जे अज्ज उत्थे दिन ढलने दे बाद बी चबक्खिया लो दिक्खी जाई सकदी ऐ। फौज नै इस पूरे ग्रांऽ च सोलर लाइटें दी बवस्था करिए उत्थे चानना करी दिते दा ऐ ते हुन लोक रातीं लै बी इक थाहर दुई थाहर बिजन कुसै डर त्राह दे जाई सकदे न। इक समां हा जदूं एहू ग्रां बन्ने पारा गोलाबारी दे सब्बनें शा मता ते बुरी चाल्ली प्रभावित ग्रांऽ हा। मेंढर सब डिविजन दी बालाकोट तहसील हेठ पौंदे इस ग्रांऽ च फौज नै ऑप्रेशन सद्भावना तैहत एहू सुविधा उपलब्ध कराई ऐ। फौज दे इक अफसर नै दस्सेया ऐ जे एहूदे नै 129 ग्रामीण लोकें गी फैयदा पुज्जा ऐ। मकामी मसीत, इक दरगाह, इक स्कूल ते ढोकें गी जाने आले रस्ते च बी हून रौशनी रौहंदी ऐ।

<><><><><><>

### Poonchi-Vocational

बच्चें गी पढाई दे अलावा भविक्ख च कम्म रोजगार दे मौके बारै जागरूक बनाने ते कन्नै सिखलाई संस्थानें च दिती जाने आली ट्रेनिंगें बारै बाकफ कराने लेई शिक्षा विभाग पुंछ आस्सेआ बफलियाज जोन दे 25 विद्यार्थिं गी आई.टी.आई ते किश होर

उद्योगिक इकाइएँ दे दौरे पर लेता गेआ। मिडल स्कूल ढोकरी दे इनें बच्चें गी उद्योगें कारखानें च किस चाल्ली कम्म होंदा ऐ, किस चाल्लीं दे सिखलाई हासल लोकें दी लोड ते कम्म रोजगार दे मौके होंदे न, इस बारै जानकारी ते वाकफी कराई गेई। आकाशवाणी कन्नै गल्ल करदे होई इक विद्यार्थी सोहेल अहमद नै आखेआ।

<><><><><><>

### DC-Doda

डोडा दे जिला विकास कमिशनर हरविंद्र सिंह होरें जिले दे केई सारे स्कूलें च विश्वग्राम ट्रस्ट गुजरात आस्सेआ कराई जाने आली बक्ख-बक्ख गतिविधिएं दी शुरूआत कीती। इनें गतिविधिएं च हुनर विकास सत्र, विचारें दे आदान-प्रदान लेई गल्लबात दी कार्जशाला, जागरूकता कार्यक्रम ते बच्चें दे पूरे-पराते विकास च कम्म औने आहिलयां होर केई गतिविधियां शामिल ना। डी.सी होरें विद्यार्थीएं गी आखेआ जे ओहू इनें गतिविधिएं च बधी चढिए हिस्सा लैन ते इंदा फैयदा ठोआन कीजे इंदे नै उंदे समाजी, मानसिक, शारीरिक ते आध्यात्मिक विकास च बी फैयदा हासल होंदा ऐ। उनें विश्वग्राम ट्रस्ट दे कम्में लेई ओहूदी मती सराहना कीती जिंदे च सेमीनार, सिखलाई कार्यक्रम ते विशेष कार्जशालाएं दा आयोजन शामिल ऐ। उनें आखेआ जे शिक्षा दे क्षेत्र च योगदान, राश्ट्र दे विकास च योगदान देना ऐ।

<><><><><><>

### India-Gaza

भारत नै गाजा च संयुक्त राश्ट्र रक्षा ते सुरक्षा विभाग डी.एस.एस च सुरक्षा समन्वय अधिकारी कर्नल वैभव अनिल काले हुंदा काल होई जाने पर दुख ते बसोस जाहिर कीता ऐ। विदेश मंत्रालय नै दस्सेया ऐ जे न्यूयार्क च संयुक्त राश्ट्र आस्तै भारत दे स्थाई मिशन ते तल अबीब ते रमल्ला च भारतीय मिशन पार्थिव शरीर गी सौंपने आस्तै सबबै चाल्ली दी इमदाद मुहैया करा रदे ना। मंत्रालय नै दस्सेया ऐ जे इस घटना दी जांच दे सरबंध्यै च सबबे सरबंध्यत अधिकारिं दे संपर्क च ऐ। कर्नल वैभव अनिल काले हुंदा सोमवारें गाजा च काल होई गेआ।

<><><><><><>

### 6-G Technology

इलेक्ट्रनिक्स ते सूचना प्रौद्योगिकी सचिव एस. कृष्णन होरें आखेआ ऐ जे 6-जी प्रौद्योगिकी मुख दी डिजिटल अर्थ बवस्था गी सशक्त बनाने ते उत्पादकता बदाने दी संभावना रखदी ऐ। नमीं दिल्ली च भारत 6-जी 2024 सम्मेलन गी संबोधित करदे होई कृष्णन होरें आखेआ जे 6जी प्रौद्योगिकी दा विकास उस्सै चाल्ली कन्नै असरदार होग जिस चाल्ली दा असर पैहली औद्योगिक क्रांति दा होआ। उनें आखेआ जे 6-जी विशाल डेटा तैयार करने गी बढावा देगा। एहू टेकनालजी सिक्खने आस्तै आर्टिफिशल इंटेलिजेंस गी बेहतर तरीके कन्नै मददगार साबित होग।

<><><><><><>

### India-UAE

दूतावास मामले सरबंध्यी भारत ते संयुक्त अरब अमीरात दी सांझी कमेटी दी 5मीं बैठक नमीं दिल्ली च लगगी जेदे च दौनें मुखें बश्कार दूतावास सतह पर सहयोग ते तालमेल बधाने बारै केई पैहलुएं पर गल्लबात होई। दौनें पक्खें वीजा जारी करने सरबंध्यी नियमें ते प्रक्रियाएं च सुधार आनने ते लोकें-लोकें बश्कार संपर्क बधाने बारै बी तफसीली सोच विचार कीता।

<><><><><><>

### EAM-Jaishankar

विदेश मंत्री डॉ. एस. जयशंकर होरें आखेआ जे चाबहार बंदरगाह सोयां समूचे क्षेत्र गी लाहू होग ते इसी लेइए तंग नजरिया नेई रक्खना लोडचदा। कोलकाता च आयोजित इक कार्यक्रम च बोलदे होई उनें आखेआ जे अमरीका बी इस सच्चाई गी स्वीकार करा रदा ते चाबहार बंदरगाह बडी मती प्रासंगिक ऐ। भारत नै सोमवार गी रणनीतिक ईरानी बंदरगाह चाबहार गी संचालित करने आस्तै 10 बरे दे अनुबंध पर दस्तखत कीते। एहू अनुबंध मध्य एशिया कन्नै बपार गी बदाने च नमीं दिल्ली आस्तै मददगार होग। अमरीका नै चेतावनी दित्ती ही जे ईरान कन्नै बपारिक समझौता रखने आले कुसै बी मुख पर प्रतिबंध लाए जाने दी संभावना ऐ। उर्जा कन्नै समृद्ध ईरान दे दक्खनी तट पर सिस्तान बलूचिस्तान प्रांत च स्थित ओमान दी खाडी पर चाबहार बंदरगाह ऐ। एहू बंदरगाह भारतीय माल गी अंतरराश्ट्रीय उत्तर दक्खन परिवहन गलियारा INSTC नां दी रेल परियोजना ते शिडक दा इस्तेमाल करिए मध्य एशिया ते अफगानिस्तान च पुज्जने दा इक प्रवेश द्वार प्रदान करोग। भारत ते

ईरान नै इस बंदरगाह गी 7 ज्हार 200 किलोमीटर लम्में INSTC दे इक मुख केंद्र दे तौर पर पेश कीता ऐ। एह बंदरगाह भारत, ईरान, अफगानिस्तान, अरमीनिया, अजरबैजान, रूस, मध्य एशिया ते यूरोप च माल लेई जाने आस्तै बहु उद्देशीय परिवहन परियोजना ऐ।

<><><><><><>

### DC-Samba-Hajj

साम्बा दे जिला विकास कमिशनर अभिषेक शर्मा होरें अज्ज अपने दफ्तर थमां हज करने जा रदे 32 यात्रिएं गी हज लेई बरदाया। इनें हज यात्रिएं च 16 मर्द ते 16 महिलां शामिल ना। इन्दे चा 28 जने नमीं दिल्ली दे आफिस अली रोड स्थित दिल्ली स्टेट हज कमेटी च रपोर्ट करडन जिसले जे बाकी 4 श्रीनगर जा करदे न जित्थुआं ओह साउदी अरब लेई रवाना होडन। डी.सी होर इनें श्रद्धालुएं गी बरदाने कोला पैहले उंदे नै गल्लबात कीती ते आखेआ जे ओह अपने मोबाइल च हज सुविधा ऐप डाउनलोड करी लैन जेदे नै उनेंगी लोड पौने पर हर जरूरी जानकारी हासल होई सकदी ऐ। इस मौके आकाशवाणी कन्नै गल्ल करदे होई उनें आखेआ।

<><><><><><>

### IPL

ते हुन क्रिकेट आई.पी.एल क्रिकेट च अज्ज राजस्थान रायल्स दा मुकाबला पंजाब किंग्स कन्नै गुवाहाटी कन्नै होगा। एह मैच संझा साड्डे 7 बजे शुरू होगा। राजस्थान रायल्स इसलै 16 अंके कन्नै दुई थाहर पर ऐ। एह टीम जित्त हासिल करिए पैहली थाहर पर पुज्जने दी कोशिश करोग। पंजाब किंग्स दी टीम प्ले ऑफ चा बाहर होई गई ऐ। कल रातीं नमीं दिल्ली दे अरूण जेटली स्टेडियम च दिल्ली कैपिटल्स नै लखनऊ सुपर जायंट्स गी 19 रन कन्नै हराई दित्ता। दिल्ली कैपिटल्स नै तय 20 ओवरें च 208 रन बनाए ते लखनऊ दी टीम तय 20 ओवरें च 189 रन गै बनाई सकी।

<><><><><><>